

《中國地方藝文薈萃》編輯委員會 編

中國地方藝文薈萃

學苑出版社

蘇東坡·第四輯 伍

華東卷·第四輯  
伍

中國地方藝文薈萃

《中國地方藝文薈萃》編委會 編

貴州師範學院內部使用



松風餘韻五十卷末一卷（三）

貴州师范学院内部使用

松風餘韻五十卷末一卷（三）

（清）姚弘緒編

據清乾隆八年（一七四三）刻本影印

松風餘韻卷第二十三

目錄

明

何良俊 一首

何良傅 二首

何三畏 一十九首

何萬化 四首

何爾復 一首

何剛 四首



松風餘韻卷二十三

胥浦姚弘緒聽巖編次

何良俊

〔明史藁〕良俊字元朗華亭人少篤學二十年不下樓與弟良傳並負俊才良傳舉進士官南京禮部郎中而良俊猶滯場屋與上海張之象同里徐獻忠董宜陽友善並有聲良俊以歲貢生入國學當路知其名用蔡羽例特授南京翰林院孔目日偕名人登臨山水題咏殆徧趙良吉王維楨相繼掌院事與相得甚歡居久之意不樂慨然歎曰吾有清森閣在海上藏書四萬卷名畫百籤古法帖彞

鼎數十種棄此不居而僕僕牛馬走乎遂移疾歸海上中倭復居金陵者數年更買宅居吳閶年七十始返故里嘗戴竹笠曳芒屨放情峰泖間所居有傲園香巖精舍四友齋著何翰林集十八卷何氏語林三十卷四友齋叢說三十卷書畫銘心錄一卷四友者莊叟摩詰樂天良俊而四也列朝詩集元朗好談兵以經世自負其在翰林也自以浮湛冗長鬱鬱不得志居三年遂移疾免歸風神朗徹襟度豪爽所至賓客填門妙解音律晚畜聲妓躬自度曲分剗合度秣陵金閶都會佳麗文酒過從絲竹競奮胥謂江左風流復見今日每為時人

所歎羨云小長蘆曰元朗早歲入南都隨顧東橋  
游讌多習舊聞東橋每讌集輒用教坊樂以箏琶  
侑觴時康陵南巡日樂工頓仁隨駕至北京得金  
元人雜劇元朗令家中小鬟盡傳之置酒留賓恒  
自度曲文酒之會未嘗廢絲竹也詩頗率意其買  
宅句云一須焦革隣舍二要秦青對門興固自豪  
第乖好樂無荒之義矣

夏日齋居即事

首夏物始和端居恣游衍林木花已敷池荷葉未展布  
穀啼空桑流鶯下崇峴雨餘竹韻清日上巖光顯澄心  
扇自捐縱目簾初捲偶因謝簿書兼得理墳典叨籍力

不任冒榮分非淺感茲華髮生滄洲若在眼神與元化  
并思將遺慮遣守道情自愜處順顏無覲升沉嗟倚伏  
明晦歎尋轉性本戀煙霞敢云輕軒冕

柘湖才而能文薄誼棠棣溺志黎園是其所短何  
孔目集極爲名流所賞弗謂其餘不足觀也錄集  
外詩一首若云本蘇李而出高岑則予未之敢信  
何良傳

**方志**良傳字叔皮嘉靖庚子舉人辛丑進士初授  
行人三年遷刑部主事力請改南得禮部儀制司  
晉祠祭司郎中南京寺觀多賜田久爲勢家侵奪  
齊庶人素縱恣會廢寺觀材植數千金者欲抑其

直強市之又諸司濫用教坊工役良傅以法守所  
在不能曲承遂不樂居職乞致仕章再上得請歸  
平生雅敦友誼楊給事允繩下獄移書鄭大司寇  
請薄其罪唐大行左溪毀爲經紀其家以女妻其  
子高誼尤著云雲間志畧大壑何公弱冠多羸疾  
一日沉痾若絕舉家悲號夫人宋氏意公必死矣  
遂自經於祠堂旦日公復甦詫曰吾夢夫人來代  
我我乃還今夫人何在亟索之則在祠堂夾室公  
痛幾絕遂不再娶者終其身所著何禮部集詩則  
條暢舒徐文亦婉麗秀潤有漢度唐風

贈徐伯臣補奉化令

嚴程忽云屈將子臨河橋弱柳向微風黃鳥時交交感  
物傷余心申爾以久要雖有盈樽酒何以永今朝徘徊  
意不極揮淚發長謠

董子元移居

南郭寡塵鞅東林有勝名青山斜枕市綠水曲依城夜  
月家家笛春風樹樹鶯結廬心自遠寧復世人情

先生幼慧同謝朓善病似休文仕宦不偶旋賦初  
衣事兄惟謹繼室終虛尤可敬也何禮部集徐長  
谷序之讀二詩可以得其概矣

何三畏

方志三畏字士抑饒州別駕獻四世孫自少穎拔

為名諸生徐文貞公勸駕北遊遂魁壬午榜屢躋  
公車就選當得司李政府朱公先拔之闈中遂借  
才紹興三畏亦藉以行志凜凜執法毫不少貸部  
使監司寄耳目於浙東西無虛月視篆暨嵯兩邑  
多異政會有表白邢節婦一事特拒貴人所請置  
訟者於律遂為蜚語所中擬改調竟飄然掛冠越  
人懷德爭口祝焉後節婦死有司至為建祠歲祀  
公論益彰及歸遭太夫人喪竟誓墓不出自為孝  
廉以至解組凡臺察長吏每過式廬請益輒以地  
方利弊寃抑不惜赤面傾膽以告無所撓避人共  
高之晚歲尤專精構撰所著有芝園居廬集鳳山

拜石堂藁

月溪院

在分水縣西北四里

層巒疊嶂列雲屏萬木參差一望清古寺潮音聽落月  
深林竹色隱疎星長生洞有神仙籙空義函開高士經  
師送虎溪知不遠相從徐步謁山靈

贈蘇爾宣居吳門

金閭南市北市虎阜前山後山天色不風不雨先生獨  
往獨還

金山寺口占示徐澤夫諸友

金山頂上三竿日揚子江頭一度春記得故鄉同送別  
如今也別故鄉人

潮音閣次林罔卿韻

地軸孤懸一芥浮，水聲拍閣似清秋。  
狎人鷗鳥林前度，聽法魚龍鉢底收。  
日落垂楊漁父曲，潮生新荻老僧舟。  
詩成欲鬪明珠色，初月飛來近女牛。

又次楊世叔韻

忽聞禪誦在煙霄，四面寒濤破寂寥。  
片月照時蛟室近，亂雲盤處蜃樓遙。  
水中塔影全依樹，臺上鐘聲半帶潮。  
至此冷然生羽翰，峰頭雙鶴不須招。

秋夜登煙雨樓

清秋一碧鏡光開，月滿南樓酒滿杯。  
極目寒烟凝暮靄，彌天晴雨散輕埃。  
凌虛倒影誇名勝，作賦登高屬上才。

此興庾公如不淺還同參佐一追陪

泊舟樵李登煙雨樓

縹緲湖光極浦東平臨煙郭起長虹  
千家燈火層雲外一望樓臺過雨中  
晴日遠浮雙塔影高天斜挂半帆風  
最憐此水清如許疑是瀟湘景色雄

夜宿煙雨樓再賦

耿耿波流落照前朱欄翠壁浸晴川  
泉聲疑湧湘江月堤柳如含夢澤煙  
北郭芙蓉天境渺前村薜荔畫圖懸  
夜深不厭重遊賞醉逐鴛鴦上酒船

范君和叔姪偕郁季雅兄弟攜盒舟中招同包

襲明黃玄之諸丈過煙雨樓劇飲又得五言